



吳興掌故集卷之六

九靈山長徐獻忠輯

延州布衣吳夢暘閱

後學茅獻徵校

藝文類上

夫文之於人亦大矣其於掌故尤不可
畧焉吳興名勝視他郡邑爲多而題詠
贈遺諸作散見於諸集者采輯獨畧予

所不能忘情莫切於是故錄之頗詳云
前溪歌按宋書樂志曰前溪歌晋車騎將
軍沈充所制郗昂樂府解題曰前溪舞
曲也凡七首予按前溪一名餘英溪出
武康之銅峴山而繞縣治之前故名沈
氏在南朝門閥特盛故習樂於溪上其
曲不但述林居之盛而長夜之樂亦見
焉然第四曲有東武亭第六曲云洛溪

邊皆非前溪所宜云者將爲後人之味
如所謂包明月者耶大率後四首別是
二人作宋少帝嘗擬前溪曲云憂思出
門倚逢郎前溪渡莫作流水心引新多
舍故殊有古意然亦妓人之詞也
憂思出門倚逢郎前溪渡莫作流水心
引新多舍故

爲家不鑿井擔甕下前溪開穿亂澗下

但聞林鳥啼

前溪滄浪映通波澄漾清聲弦傳不絕
末興天地并

逍遙獨乘頭北望東武亭黃瓜被山側
春風感郎情

逍遙獨乘頭東北無廣親黃瓜是小草

憶汝淚交零

此二首見
一人作

黃葛被蒙朧生在洛溪邊花落逐水去

何當順流還亦不復解

黃葛生爛熳誰能斷葛根寧斷嬌兒乳
不斷郎殷勤

按充本詞止當曙復未曙百鳥啼匆匆
宋書所收七曲皆擬作也當名爲吳歌
晉王韶之贈潘綜吳遠舉孝庶六首

東寶惟金南木有喬發輝層厓竦榦重
霄美哉茲土世載英髦育嗣幽林養音

九臯

唐后明馭漢宗蒲輪我皇降監思樂懷
人羣臣競荐舊章維新余亦奚貢曰義
與仁

仁義伊在惟吳與潘心積純孝事著艱
難投死如歸淑聞若蘭吳實發仁心力
借殫因此苦節易彼歲寒霜雪雖厚松
栢九九

人亦有言無善不彰二子徽猷靡久靡
芳拔叢出類景行朝陽誰謂道遐弘之
則光咨尔庶士無然怠荒

江革奉贄慶祿是荷姜詩入貢漢朝咨
嗟曷哉行人敬尔休嘉俾是王國炤輝
京華

伊余朽駘竊服懼盜無能禮樂豈暇聲
教順彼康夷懿德是好聊綴所懷以贈

二孝

李顥涉太湖云旋經義興境頓棹石蘭渚
震澤爲何在今惟太湖浦園徑縈五百
眇目渺無睹高天森若岸長津雜如縷
窈窕尋灣碕迢遞望巒嶼驚颺揚飛湍
浮霄漾懸阻輕禽翔雲漢游鱗憇中滸
曠藹天時陰岩崑舟航舞馮河安可徇
靜觀戒行旅

梁柳惲江南曲云汀洲采白蘋日落江南
春洞庭有歸客瀟湘逢故人故人何不
返春華復應晚不道新知樂只言行路
遠

柳惲贈吳均云寒雲晦滄洲奔潮溢南浦
相思白露亭未望秋風渚心知別路長
不謂若燕楚關侯日遼絕何因附行旅
願作野飛鳥飄然自輕舉

又云山桃落晚紅野蕨開初紫雲日自
清明蘋芷齊靡靡離合已鬱陶物華復
如此

吳均迎柳吳興道中云團團日西靡客念
已蹉跎長風倒危葉輕練網寒波白雲
光采麗青山意氣多所言飽恩德忘我
北山蘿

吳均青山偶書云家住青山下時向青山

上青山不可上一上一惆悵

吳均同柳吳興烏亭集送柳舍人云河陽
一帳望南浦送將歸雲山離掩曖花霧
共依霏流連反舌弄下上渚禽飛桂舟
無掩柅玉軫有離徽願君嗣蘭杜時拂
東臯薇

吳均同柳吳興何山云王孫重離別置酒
媿峰巖透迤川上草參差澗裏薇輕雲

紉遠岫細雨沐山衣簷端水禽息窓上
野螢飛君隨綠波遠我逐清風歸

吳均采藥大布山云我本此山北緣澗采
山麻九莖日返照三葉長生花可以蠲
憂疾聊持駐景斜景斜不可駐年來果
如偃安得崑崙山偃蹇樹三株三株樹
如芰絳葉凌朱臺玉壺白鳳肺金鼎青
龍胎韓衆及王子何代無仙才安期儻

欲顧相見在蓬萊

吳均夏駕山尋朱思之云秣馬出城闈百
里尋故人禽魚皆舊賞松檜是新親有
道干木宮無財原憲貧寄書鵝冠子惟
得與鄒真

吳均送柳吳興竹亭集云平原不可望波
瀾千里直夕魚汀下戲暮雨簷中息白
雲時去來青峰復員側躑躅牛羊下晦

味崦嵫色王孫猶未歸且聽西光匿

吳均別夏侯故鄣云白馬黃金羈青驪紫
絲控新知關山別故人河梁送置此一
函書爲予達雲夢

吳均采蓮曲云江南當夏清桂檝逐流縈
初疑京兆劔復似漢冠名荷香帶風遠
蓮影向根生葉捲珠難溜花舒紅易傾
日暮亮舟滿歸來度錦城

錦帶雜花鈿羅衣垂綠川問子今何去
出采江南蓮遼西三千里欲寄無因緣
願君早旋返及此荷花鮮

蕭子雲贈吳均云欲知捷少年木來最輕
黠綠沉弓頓縱紫艾刀應拔誰持命安
寵寧知敵可 有功終不言明君自應

察

何遜贈丘末嘉征還

丘遜爲末嘉太守有
司糾其不職而還

龍馬魚腸劍蹀躞起風塵結客葱河返
喧喧動四鄰入墟猶憶舊德巷復疑新
窺見應門出遙識下機人相悲淚欲下
離言方自陳

何遜答丘長史遲云宿昔敦遠遊名分乃
異路千里泝波潮一朝披雲霧從容捨
密勿繾綣論襟趣披文極詆呵拆理窮
章句明鍾信有待巨海誰能踰奔景驟

西傾還途忽東驚黃花繁岸草赤蕪翻
高樹漁舟乍回歸沙禽時獨赴宴年時
未幾離歌倏成賦伊我念出關夫君恩
贄務短翮方息飛長轡日先驅曝腮
走逸翮康時務握手異沉浮佳期安
可屢

何遜哭柳吳興云南州擅荆梓上國稱羽
儀伊人以載惠李公傷在期遠識內無

溫深衷外有窺清文窮麗則弘論盡高
竒多能誠所貴小善聊復爲百步均射
葉八體妙臨池曲悟全神解龜謀信有
知入朝耿長劔出牧盛層塵納言信加
首豐貂亦在移霞區兩借義會泉一舉
卮翰飛矯未極朝露溘先危以茲舊會
想况乃西日垂萋草生車藏枯木卧崩
坻樽酒誰爲滿靈衣空自披眷言尋惠

好動哭悲路岐含毫徒有屬楮管竟無
摘

丘遲題琴朴奉柳吳興云邊山此嘉樹搖
影出雲垂清心有素體直榦無曲枝凡
耳非所別君子特見知不辭去根本造
膝仰光儀

江淹贈袁常侍云昔我別楚水秋月麗秋

天今君客吳坂

袁昂時爲吳興太守

春日媚春泉

幽冀生碧草沅湘含翠煙鏤鏤霞上景
惜惜雲外山涉江竟何望留滯空采蓮
江淹黃蘗澗云長望竟何極閩雲連越邊
南州饒竒怪赤縣多靈仙金峰各虧日
銅石共臨天陽岫照鸞采陰谿噴龍泉
殘磯十代木唐萃萬古煙禽鳴丹壁上
猿嘯青厓問秦皇慕隱淪漢武願長年
昔負雄豪威棄劍藏名山况我葵藿志

松木橫眼前所若同遊好臨風載悠然
鮑照吳興黃浦亭庾中郎別云風起洲渚
寒雲上日無輝連山眇煙霧長波迥難
依旅鴈方南過浮客未西歸已經江海
別復與親媿遠奔景易以窮離袖安可
揮懂觴爲悲酌歌服成泣衣溫念終不
渝藻志遠存追役人多牽滯顧路慙奮
飛昧心附遠翰烟言藏佩韋

鮑照送盛侍郎餞侯亭云
霑霜襲冠帶驅
駕越城闌北路出塞道
南望入鄉津高
塘宿寒霧平野起秋塵
君爲坐堂子我
乃負羈人欣悲豈等志
甘苦誠異身結
睇園中草憔悴悲此身

鮑照自礪山東望震澤云
瀾漫潭洞波合
沓嶸嶂雲漲島遠不測
岡澗近難分幽
篁愁暮見思鳥傷夕聞
以此藉沉疴棲

迹別人群結言非盡書
有念豈敷文

鮑照從庾中郎園山石室
云荒塗趣山楹
層崖隱靈室崗澗紛縈
抱林障杳重密
昏昏磴路深活活梁水
疾幽隅秉晝燭
地塘窺朝日怪石似龍
章暇壁麗錦質
洞庭安可窺滙井終不
溢沉空絕景聲
崩危坐驚慄神化豈有
方妙象竟無述
至哉鍊玉人處此長自
畢

按顏魯公杼山妙喜寺碑有云寺前二十步有黃浦橋南五十步又有黃浦亭宋鮑照送盛侍郎及庾中郎賦詩之所則鮑詩所謂餞侯亭者即黃浦亭也又妙喜寺碑銘云棚以桂結清由黃申二庾迢遞三癸嶙峋庾謂中郎兄弟與盛侍郎皆爲烏程人可知矣鮑詩於盛則曰北路出塞道南望入鄉津又云君

爲坐堂子我乃負羈人可見盛爲吳人也于庾則遊其園山石室云洞庭安可窮漏井終不溢則當在北山洞壑之間若今之黃龍玲瓏者是也

陳後主韋玄武湖餞吳興太守任忠云寒雲輕重色秋水去來波待我戎衣定還誄大風歌

江總卞山楚廟云蘋藻祈明德倚棹息岩

阿忽聽鳥鳴曙非復楚宮歌閑堦薜宿
莽古木斷懸蘿帷堂寂易晚桴鼓自相
和感祀流百世英威言幾何

陰鏗罷古鄆縣云秩滿三秋暮舟虛一水
濱漫漫遵故道悽悽對別津晨風下散
葉岐路起飛塵長岑舊知遠萊蕪本白
貧被裏恒客吏正朝不繫民唯當有一
積留持贈後人

高爽吳興妖神贈謝府君覽云玉釵空中
墮金鈿色行歇獨泣謝春風孤夜傷明
月

唐宋之間餞湖州薛司馬云別駕促嚴程
離筵多故情交深季作友義重伯爲兄
鎮靜移吳俗風流在漢京會看陳仲舉
從此拜公卿

李白答湖州葉司馬云青蓮居士謫仙人

酒肆藏名三十春
湖州司馬何須問
金粟如來是後身

岑參餞李尉武康云
潘郎腰綬新霽上
縣花春山色低官舍
湖光映吏人不須嫌
邑小莫即耻家貧
更作東征賦知君有
老親

常建送李十一尉臨溪

即今德清

泠泠花下琴

君唱渡江吟
天際一帆影
預懸離別心

以言神仙尉因致瑤華音
迴軫撫商調
越溪澄碧林

郎士元送別錢起云
暮蟬不可聽
落葉豈堪聞
共是悲秋客
那知此路分
荒城背流水
遠鴈入寒雲
陶令門前菊
餘花可贈君

錢起晚春歸山隱
居云谷口春殘黃鳥稀
辛夷落盡杏花飛
始憐幽竹山窻下不

改清陰待我歸

錢起山中酬梁補闕見過云日暖風恬種
藥時紅泉翠壁薜蘿垂幽谿鹿過苔還
靜深樹雲來鳥不知青草同心多逸興
春山載酒遠相隨却慙身外牽纓冕未
免杯前倒接離

錢起幽居春暮書懷云自咲鄙夫多野興
貧居數畝半臨湍溪雲雜雨來茆屋山

鳥將鷓鴣傍藥欄仙籙滿床閒不厭陰符
在篋老羞看更怜童子宜春服花裏尋

師到杏坡

劉長卿

長卿被誣貶南巴尉有為之辨者
改除睦州司馬南行道出吳興類

有贈遺
之作

過朱處士別業名杜門成白首

湖上寄生涯秋草閒三徑寒塘獨一家
鳥啼村落靜水向縣城斜愛汝醒還醉

東籬菊正花

過鄔三湖上書齋名何事東林客忘機一

釣竿酒香開甕老湖色對門寒向郭青
山送臨池白鳥看見君能浪跡予亦厭

微官

雲溪館云寥寥北堂上幽意獨誰論落日
無上事青山在縣門雲峰向高枕漁浦
入前軒竹動踈簾影苔生雙屐痕荷香
隨坐卧湖色映朝昏虛牖閑生白浮鷗

靜對言暮禽飛上下春草帶清渾遠岸
誰家柳孤煙何處村謫居披瘴癘離思
過湘沅從此扁舟去誰堪江浦猿

茗溪酬梁耿員外別後見寄云清川末路
何極落日孤舟解携鳥向平蕪遠近人
隨流水東西

白雲千里萬里明月前溪後溪惆悵長
沙謫去江潭芳草萋萋

集梁耿開元寺所居院云到君幽卧處爲
我掃莓苔花雨晴天落松風終日來路
經深竹過門向遠山開豈得長高枕中
朝正用才

皇甫曾侍御遊烏程水樓留別云悠悠千
里去惜此一樽同客散高樓上帆飛細
雨中山程隨遠水楚思任青楓其說前
期遠滄波處處通

送陸羽漸采茶相過云千峰待逋客香茗
復叢生採摘知深處煙霞羨獨行幽期
山寺遠野飯石泉清寂寂然燈夜相思
一磬聲

皇甫冉送陸羽栖霞寺採茶云採茶非採
茶遠遠上層崖布葉春風暖盈筐白日
斜舊知山寺路時宿野人家借問王孫
草何時況槲花

司空曙送王師歸湖州云煙蕪滿洞青山
繞幢節飄空紫鳳飛金闕乍看迎日麗
玉簫遙聽隔花微多開石髓供調膳時
御霓裳奉易衣莫學遼東華表上千年
始欲一迴歸

崔桐武康郭外望許緯先生山居云湖上
千峰帶落暉白雲開處見柴扉松門一
徑仍生草應是仙人向郭稀

張籍舟行寄李湖州云客愁無次第川路
重辛勤藻密行舟澁灣多轉楫頻薄遊
空感惠失計自怜貧煩誦汀洲句時時
慰遠人

張籍西亭晚望云雲水碧悠悠西亭柳岸
頭夕陽生遠岫斜照逐迴流此地動歸
思逢人方倦遊吳興耆舊盡空見白蘋
洲

耿緯西亭云高亭賓客散暑夜醉相和細
雨凝衣集微涼待扇過風還池色定月
晚樹陰多遙想隨行者珊珊動曉珂

顏魯公杼山癸亭云杼山多幽絕勝事盈
跬步前者雖登攀淹留限晨暮及茲紆
勝分曾是羨無度歛搆三癸亭寔維陸
生故高賢能翔物䟽鑿皆有趣不越方
丈間居然霄雲遇巍巍倚脩岫曠望臨

古渡左右苔石攢低昂桂枝蠹山僧挾
猿欣崇鳥來枳相俯視何楷堂傍瞻戴
顛路遲徊未能下夕照明村樹

顏魯公石罇聯句

共二十九人公之諸子亦與

李公登飲處因石爲窪罇真人事歲年

改峴山今古存

劉全白詩事

榛蕪掩前跡苔

蘚餘舊痕

裴循縣尉

叔子尚遺德山公此廻

軒

張薦右衛兵曹張著之弟

維舟陪高興感昔情彌

敦道士藹藹賢哲士依依離會言強嶇

嶽橫周道迢迢連山根范餘列援林野

衆芳揖蘭蓀王純德輝映岩足勝賞延高

原魏理遠水明匹練因晴見吳門王脩

陪遊追盛美揆德欣討論顯器有成形

用工資造化源左輔元撫州人增廣流

霞方泊淡別鶴寄翩翩劉茂魏舊規傾

逸賞新興麗初暄顏醉復接羅倒歸時

駟騎喧楊德元遲徊尚遺迹離別益傷

魂常介南覽事古典屬送人歸思繁然

懷賢久徂謝贈遠空攀援崔私公案鐫

遺躅高名布乾坤文仲松深引間步葛

弱供險捫陸花氣酒中馥雲華衣上屯

丘子中深沉列湖渚牢落望郊原陸士脩

白日半岩岫清風滿丘樊裴幼旌麾間

翠幄簫鼓來朱幡柳開路躡雲影清心

澄水源

釋鹿外

萍聯浦中嶼竹遶山下村

顏顥此下

景落全溪暗煙凝半嶺昏

顏顥

去日往如復換年涼代温
顏顥 頽登臨寄風

騷義激舊府恩

李萼前殿中侍御史

僧清書

字皎然集中多吳興詩今取人物可考及勝地者著云

○冬日梅溪送裴方舟之宣城云平明正
馬上村橋花發梅溪雪未消日短天寒
愁送客楚山無限路迢迢

○題周諫別業云隱身落上欲如何不着

青袍愛綠蘿柳巷任疎容騎入水籬從

破許船過昂藏獨鶴閒心遠寂歷秋花

野意多若訪禪齋遙可見竹窓書幌共

煙波

○酬李司直縱諸公冬日遊妙喜寺寄長

城潘丞述云達賢貴真隱常懼迹不滅

遂與未公期遺身坐林樾華軒何鞦韆

雪山詩卷一
三
爲我到幽絕心境寒草花空門青山月
潘生獨不見清景屢盈缺林下長寂寥
人問自離別何時解輕佩來稅丘中轍
李司直居吳興之北山故又寄云南山
惟與北山鄰

○吳羌山破寺云雙峰百戰後真界滿塵
埃蔓草綠空壁悲風起故臺野花寒更
發山月暝還來何事池中水東流獨不回

○兵後送薛居士移家安吉云舊遊經喪
亂道在復何人寒草心易拆閒雲性常
真交情別後見詩句比來新向我桃州
住惜君東嶺春

○冬日遙和盧使君幼平綦毋居士遊法
華寺高頂臨湖亭云仁坊標絕竟廡宇
躡高蹤天曉纔分刹風傳欲盡鍾城中
歸路遠湖上碧山重水照千花界雲開

七葉峰寒空艾綬滿空翠白綸濃逸韻
知難繼佳遊恨不逢仍聞撫禪石爲我
久從容

和盧使君又一首遊朝陽寺臨太湖惟
首四句小異

僧靈一茗溪云茗水灘行淺潛洲路漸深
參差遠岫色迢遞野人心東澗冰難釋
秋山月易陰不知天目下何處訪雲林

靈一靜林寺云靜林溪路遠蕭帝有遺蹤
水擊羅浮磬山鳴于闐鍾燈傳三世火
樹老五林松無數煙霞色空聞昔卧龍
靈一天目山云昨夜雲生天井東春來一
雨一迴風林花併逐溪流下欲上龍池
路不通

靈一與元八處士青山潭飲茶云野泉煙
火白雲間坐愛香茶對此山岩下維舟

不忍去青溪流水暮潺潺

李涉在維揚見吳興劉全白員外之愛姬
名宋態者流落其地因感昔年之分作

一詩二首

長憶雲仙至小時芙蓉頭上綰青絲當
時驚覺高唐夢惟有而今宋玉知

陵陽夜宴使君筵解語花枝在眼前自
從明月西沉海不見嫦娥二十年

帝應物寄皎然云吳興老釋子野雪蓋精
廬詩名徒自振道心常晏如想茲栖禪
夜見月東峯初鳴鍾驚岩壑焚香滿空
虛夙慕端成舊未識豈爲踈願以碧雲
思方君怨別餘茂苑文華地流水古僧
居何當一游泳倚閣吟躊躇

李端憶皎然云未得從師去人間萬事勞
雲門不可見山木已應高向日開柴戶

經秋間敝袍無由宿峰頂窓裏望波濤
盧綸奉同顏真卿送李侍御萼賦得荻塘
路云雲鱗鱗滿河濱疊處淺旋處深撒
波寒魚上復沉群鶩鼓舞揚清音主人
有客簪白筆玉壺貯此光如一持此贈
君君飲之聖主識君冰玉姿

李頻送吳興陸弘云雪後江上去風光故
園新清輝天氣曉綠動浪花春勸酒提

壺鳥乘舟震澤人誰知滄海月取桂邾
來秦

杜牧之茶山云山實東南秀茶稱瑞草魁
剖符雖俗吏脩貢亦仙才溪盡停蠻棹
旗張卓翠苔柳村穿窈窕松澗度喧度
等級雲峰峻寬平洞府開拂天聞咲語
特地見樓臺泉嫩黃金涌芽香紫壁栽
拜章期沃日輕騎疾奔雷舞袖嵐侵潤

歌聲谷答回磬音藏葉烏雪艷點潭梅
好是全家到兼爲奉詔來樹陰香作障
花徑落成堆景物殘三月登臨愴一杯
重遊難自刻俛首入塵埃

牧之茶山下題水口草市云倚溪侵嶺多
高樹誇酒書旗有小樓驚起鴛鴦豈無
恨一雙飛去却回頭

牧之霽溪館云萬家相慶喜秋成處處樓
臺歌板聲千歲鶴歸猶有恨一年人住
豈無情夜涼溪館留僧話風定蘇潭看
月生景物登臨閒始見願爲閒客此閒
行

牧之消暑樓云晴日登攀好危樓物象饒
一溪通四境萬岫繞層霄鳥翼舒華屋
魚鱗棹短橈浪花機作織雲葉匠新雕
臺榭羅家卉城池敞麗譙蟾蜍來作鑑

帶竦引成橋燕往隨秋葉人空習早朝
楚鴻行盡直沙鷺立偏翹暮角悽遊旅
清歌慘泐瀟景牽游目困愁托酒杯消
遠吹流松韻殘陽度柳標時陪庾公賞
還悟脫煩囂

牧之吊沈下賢云斯人清唱何能和草徑
苔蕪不可尋一夕小敷山下過水如環
珮月如襟

沈亞之村居云有樹巢宿鳥無酒共客醉
月上蟬韻殘梧桐陰繞地獨出村舍門
吟劇微風起蕭蕭蘆荻叢叫嘯如山鬼
應緣我憔悴爲我哭秋思

李賀送沈亞之歌并序云文人沈亞之元
和七年以書不中第返歸於吳吾悲其
行無錢酒以勞又感沈之勤請乃歌一
解以送之

吳興才人怨春風桃花滿陌千里紅紫
絲竹斷驄馬小家住錢塘東復東白藤
交穿織書笈短策齊裁如梵夾雄光寶
鑿獻春卿煙底鷺波乘一葉春卿拾材
白日下擲置黃金解龍馬携笈歸江重
入門勞勞誰是怜君者吾聞壯夫重心
骨古人三走無摧粹請君待旦事長鞭
他日還轅及秋律

張祐送沈亞之南康尉云秋風江上草先
是客心催萬里故人去一行新鴈來山
高雲緒繼浦迥日波頽莫怪南康遠相
思不可裁

李頻送德清喻明府云返棹霅溪雲仍參
舊使君州傳多古跡縣記是新文水柵
橫舟閉湖田立木分但如詩思苦爲政
即超群

朱長文寓吳興送梁補闕歸朝賦得荻花
云柳家汀洲孟冬月雲寒水清荻花發
一枝持贈朝天人願比蓬萊殿前雪
李郢和杜員外白蘋洲至日見憶云白蘋
亭上一陽生湖眺新裁錦繡成千嶂雪
消溪影綠幾家梅綻水波清已知鷗鳥
常來狎可許汀洲獨有各多媿龍門重
招引即拋田舍棹舟行

杜牧之白蘋洲云山鳥飛紅帶亭薇折紫
花溪光初透徹秋色正清華靜處知生
樂喧中見死誇無多珪組累終不負煙

霞

白居易夜聞賈常州崔湖州茶山境會歡
宴云遙聞境會茶山夜珠翠歌鍾俱繞
身盤上中分兩州界燈前合作一家春
青娥對舞應爭妙紫筍齊嘗各聞新自

咲花時客窓下蒲黃酒對病眠人

白居易上強精舍云慣遊山水住南州行
盡天台及虎丘惟有上強精舍寺最堪
遊處未曾遊

劉夢得和崔元亮三癖云視事畫屏中自
稱三癖翁管絃汎春渚旌旆拂晴虹酒
對青山月琴韻白蘋風會書團扇上知
君文字工

李季蘭寄殷七校書云無事烏程縣蹉跎
歲月餘不知芸閣吏寂寞竟何如遠水
浮仙棹寒星伴使車因過大雷岸莫忘
數行書

陶現吳興回棹云匡廬舊業是誰主吳越
新居安此生白髮數莖歸未得青山一
望計還成鴉翻風葉夕陽動鷺立蘆花
秋水明從此捨舟何所詣酒旗歌扇正

相迎

張文規吳興三絕云蘋洲頓覺池沼俗芋
布直勝羅紈輕清風樓下草初出明月
峽中茶始生吳興三絕不可捨勸子強
爲吳會行

袁高茶山云禹貢通遠俗所圖在安人後
王失其本職吏不敢陳亦有奸佞者因
茲欲求伸動生千金費日使萬姓貧我

來顧渚源得與茶事親昨輟耕農耒采
采日苦辛一夫且當役盡室皆同臻捫
葛上欹壁蓬頭入荒榛終朝不盈掬手
足皆皴鱗悲嗟遍青山草木皆不春陰
嶺芽未吐使君牒已頻心爭造化力先
走鋌鹿均選納無晝夜搗聲昏繼晨衆
工何枯槁俯仰彌傷神皇帝尚巡狩東
郊路多堙週迴達天涯所獻踰艱勤况

減兵革困量茲固疲民未知供御餘誰
合分此珍顧省忝邦守又慙復因循茫
茫滄海間丹憤何由申

楊漢公郡城樓云吳興城闕水雲中畫舫
青簾處處通溪上五樓樓上月清光合

作水晶宮

許渾雪溪館云山斷水茫茫洛人西路長
笙歌留遠棹風雨寄華堂紅壁耿秋燭

翠簾疑遠香誰堪從此去雲樹滿陵陽
許渾過湖州李郎中舊宅云政成身沒共
興哀鄉路兵戈旅襯回城上暮雲疑鼓
角海邊春草閉池臺經年未莖佳人散
昨日因齋故吏來南北相逢皆掩淚白
蘋洲上蓼花開

許渾送客歸吳興云綠水棹雲航洞庭歸
路長春橋懸酒幔夜柵集舩檣箭葉沉

溪暖蘋花繞郭香應逢柳太守爲說過

瀟湘

周朴董嶺水云湖州安吉縣門與白雲齊
禹力不到處河聲流向西去衙山色遠
近水月光低中有高人在沙中曳丈藜
孟東野悼楊衡云君生雲水清君死雲水
渾空有骨肉親哭得日月昏大夜不復
曉古松長閉門琴絃綠水絕詩句青山

存昔爲芳春顏今爲芳樹根獨恨冥冥
理先儒未嘗言

孟郊失意歸吳興寄劉侍郎云自念西上
身忽隨東歸風長安日下影又落江湖
中離婁豈不明子野豈不聰至寶非眼
別至音非耳通因緘俗外辭遠寄高天
鴻

僧法振寄錢郎中云閉門深樹裏閒足鳥

掌故集卷六
來過五馬不復貴一僧誰柰何藥苗家
自有香飯乞時多寄語嬋娟客將心向
薜蘿

僧法振同顏使君送李法曹陽冰西上獻
書云漢代中郎妙周王太史才雲書捧
日去鶴板下天來草見吳洲發花思御
苑開羊公借風景欲別幾遲徊

僧明教題資福寺松月軒云築軒居隱謝

塵埃聞向松邊月下開九夏陰陰張翠
蓋三更寂寂照靈臺未疑李白騎鯨去
猶恐秦王避雨來欲覓宗師無覓處落
花金粉污蒼苔

包何送烏程王明府貶巴江云一片孤帆
無四鄰北風吹過五湖濱相看盡是江
南客獨有君爲嶺外人

楊夔送杜郎中入茶山脩貢云一道澄瀾

徹底清仙郎輕棹出重城採蘋郡得當時稱述職方同此日榮劔戟步搖當嶂黑綺羅光動百花明謝公携妓東山去何似乘春奉詔行

顧况送李侍郎從宣城泊洞庭往吳興云
世間惟有情難說今夜應無不醉人君
向洞庭山下過也須澆瀝聖姑神

顧况白蘋洲送客云莫信梅花發年來漫

報春不才充野客扶病送朝臣闕下搖
青珮洲邊採白蘋臨流不痛飲鷗鳥也
欺人

李季蘭湖上卧病喜陸鴻漸至云昔去繁
霜月今來苦霧時相逢仍卧病欲語淚
先垂強勸陶家酒還吟謝客詩偶然成
一醉此外更何之

于頔郡齋卧疾贈畫上人云夙陪翰墨徒

深論窮文格麗則風騷後然公我詞客
晚依方外友極理探精贖膈合南北宗
晝公我禪伯光明性不染故我行貞白
隨時令得解故我言芳澤霽水漾清潯
吳山橫碧岑含珠復蘊玉價重雙南金
的爍耀竒采淒清流雅音商聲發楚調
調切諧瑤琴吳山爲我高霄水爲我深
萬景徒有象孤雲本無心衆木豈無聲

倚桐有清響衆耳豈不聆鍾期有真賞
高潔古人操素懷夙所仰覲君冰雪姿
祛我淫滯想常吟柳惲詩茗浦久相思
逮此遠爲郡蘋洲芳草衰逢師年臘長
值我病容羸共話無生理聊用契心期
陸龜蒙自遣詩序曰自遣詩震澤別業之
所作也故疾未平厭厭卧田舍中農夫
以耒耜事相晤每至夜分不睡則百端

興懷因作四句累至三十絕

今錄其有
關吳興者

首五

五年重到舊山村樹有交柯犢有孫更
感卞峰顏色好曉雲纔散已當門

花瀨濛濛紫氣昏水邊山曲更深村終
須揀取幽栖處老檜雙成便作門

陰洞曾爲採藥行冷雲凝絕燭微明玉
枝槁拆瑋然墮合有真官上姓名

一派溪從箬下流春來無處不汀洲漪

蘭未碧蒲猶短不見鴛鴦正自由

賢達垂竿小隱中我來真作捕魚翁前

溪一夜春流急已學嚴灘下釣筒

陸龜蒙紀事詩本作漁釣徒心將遂跡放
苦爲衣食累未得恣閒暢去年十二月

身往雪水上病裏見豐登鷄豚聊饋餉

嵬峩卞山雪凝列不可向瘦骨倍加寒

徒爲厚繒續晴來露青靄萬仞欽尋丈
卧恐玉華消時時推枕望雖然營衛因
亦覺精神王把筆強題詩粗言瓌恠狀
吳興鄭太守文律頗清壯鳳尾與鯨牙
紛撇落新唱緘書寄城內塘突無以狀
料峭採蓮舫縱橫簸天浪方傾謝公言
忽值莊叟喪鄭員外仁規是年受代喪偶嘿嘿阻微
音臨風但惆悵春歸殆秋末固自嬰微

恙歲早弗躬親何由免欺誑今來觀刈

穫乃在松江竝

步浪反

門外兩潮通波瀾

先蕩漾都緣新卜築是事皆草創爾後

如有年還應愜微尚天高氣候爽野迥

襟懷曠感物動牢愁憤時頻骯髒平生

樂篇翰至老安敢望駿骨正牽鹽玄文

終覆醬嗟今多赤舌見善惟蔽謗忖度

大爲防涸容寬作量圖書篋麓外關眼

皆賸長餓隸亦勝無薄田家所仰稍離
飢寒患古學真可強聖道麤經營世徒
多踉蹌近聞天子詔復許私醞釀趣使
春酒熟呼兒具盃盎宵長擁吟褐日晏
開書幌醉鄉我可還陶然似元亮

皮日休西塞山漁家云白綸巾下髮如絲
靜倚楓根坐釣磯中婦棄材挑葉去小
兒沙市賣蓑歸雨來葦菜流舩滑春後

鱸魚墜釣肥西塞山前終日客隔溪相
羨盡依依

皮日休傷嚴子重云十哭都門榜上塵蓋
棺終是五湖人生前有敵惟丹桂沒後
無家祇白蘋箬下斬新醒處月江南依
舊味來春知君精爽應無盡必在鄂都
頌帝宸

曹松遊寓吳興去時別主人云門繫釣舩

雲滿岸借君幽致坐移旬湖村夜叫白
蕪鴈菱市曉喧漁浦人遠水日邊重作
雪寒林燒後別生春不辭更後醒還醉

太乙東峰歸夢頻

松字夢微
舒州人

鄭谷寄湖州從叔員外云顧渚山邊郡溪
將罨畫通遠看城郭裏全在水雲中西
閣歸何晚東吳興未窮茶香紫筍露洲
迤白蘋風歌緩眉低翠杯明蠟剪紅政

成尋往事輟棹問漁翁

張碓蘋洲翡翠云碧水色堪染白蓮香正
濃分飛俱有恨此別幾時逢藕隱玲瓏
玉花藏縹緲容何當假雙翼蘆影暫相
從

羅隱雲溪晚泊寄裴庶子云溪風如扇雨
如絲閒步閒吟柳惲詩杯酒踈狂如曩
日野花狼藉是當時道窮漫有依劉感

才急應無借寇期滿眼雲山莫相笑與
君須是愛深知

羅隱贈湖州裴郎中云貴提金印出咸秦
蕭洒江城兩度春一派水清疑見膽數
重山翠欲留人望崇早合歸黃閣詩好
何妨戀白蘋自是受恩心未足却隨雙
翅羨吳均

羅隱酬烏程丘光庭云正月十一日書札

五月十六日到來柳吟秦望咫尺地鯉
魚何處閒徘徊故人情意未踈索次第
序述眉眼開上言三年隔煙水下有數
幅真瓊瑰行吟坐讀口不倦瀑泉激射
琅玕摧壁池蘭蕙日已老村酒醮甲時
幾杯鶴齡鴻算不復見雨後篔簹笠空莓
苔自從黃寇擾中土人心波蕩猶未回
道因合眼拜九列張濬掉舌升三台朝

廷濟濟百揆序寧將對面容奸回禍生
有基妖有漸翠華西幸蒙塵埃三川梗
塞兩河暗大明宮殿生蒿萊懦夫早歲
不量力策蹇仰北高崔嵬

迥

鎖密良匠不肯雕散材君今得意尚如
此况我麋鹿悠悠哉榮衰貴賤目所睹
莫言頭白黃金臺

方千湖上書事寄長城喻明府云吟霜與

卧雲此興亦甘貧吹箭落翠羽垂絲牽
錦鱗滿湖風撼月半日雨藏春却咲紫
簪組勞心遠字人

方千送李秀才遊霽上云婆娑戀酒山花
盡繚繞還家山路通轉楫擬投青草岸
吹帆猶是白蘋風淮邊欲暝輦聲急洛
下先寒苑樹空詩句因余更孤峭書題
不合忘江東

張說爲徐堅作挽歌云才美臨淄北名高
淮海東羽儀三省遍漁獵五軍通玉殿
孤新榜珠英落舊叢徒存一寶劍何處

訪徐公

朱慶餘送石協律歸吳興別業云識來無
定居此去復何如一與耕者遇轉將朝
客踈資身惟藥草教子但詩書魯許黃
庭木斯言豈合虛

朱慶餘陪湖州韓中丞讌云老大成名仍
足病強留絲竹亦無懼高情太守留閑
坐借與青山盡日看

周賀送石協律歸吳云僧窓夢後憶歸耕
水涉應多半月程幕府罷來無藥價紗
巾戴去有山情夜隨淨渚離蛩語早遇
寒潮背井行已讓辟書稱抱疾滄洲便
許白髭生

喻鳧送石賁歸吳興云同志幸同年高堂
君獨還齊榮恩未報共隱事皆閒訪寺
臨河岸開樓見海山洛中推二陸莫久

戀鄉關

僧無可送邵謁及第歸湖州云秦關鳥啼
罷歸路浙煙西郡守招延重鄉人仰慕
齊橋青逃著寺茶長隔湖谿乘暇知高
眺微應辨會稽

薛能送趙道士歸天目舊山云愚朴尚公
平此心鄰道情有緣終自蔽何計逐師
行日者聞高躅時人蓋強名口無滋味
入身欲羽衣生表乞還鄉遠詩曾對御
成土毛徵到越塵髮倦離京符呪風雷
惡朝脩月露清觀臨天目頂家住海濤
聲導引圖看足參同註解精休糧一擬
問惹草俟回程

皎然題張鍊師天目山所居云採薪逢野
泉漸見栖閑所坎坎山上聲幽幽林中
語仙卿何代隱鄉服語亦楚開水洗藥
苗掃雪候仙侶零葉聚敗籬幽花積寒
渚冥冥孤鶴性天外思輕舉

杜荀鶴寄顧雲云省得前年別蘋洲旅館
中亂離身不定彼此信難通侯國兵雖
歛吾鄉業已空秋來憶君夢夜夜逐征

鴻

薛逢送慶上人歸湖州因寄道儒座主云
上人今去白蘋洲雪水蒼溪我舊遊夜
雨暗江漁火出夕陽沉浦鴈花收閑聽
別鳥啼紅樹醉看歸僧棹碧流若見儒
公憑寄語數莖霜鬢已驚秋

皎然桃花石枕歌卞山幽石產竒璞荆人
至死採不着何人琢枕持贈君片片桃

花開未落劒工見兮可爲劒玉工辨兮
知非石至寶由來鑒者稀今君獨鑒應
欲惜何辭售與常天真幸得提携親玉
人河中棄置君不顧天生秀色徒璘玢
四座喧喧爭目玩巧過造化稱一絕莫
言昨日因錯磨看取從來無玷欽六月
江南暑未闌一尺花冰拭枕看高齋正
午風颭颭室中不減先春寒主人所重
易心與君天下爲士則

皎然杼山禪居寄東溪吳馮處士三首

青雲何潤澤下有賢人隱路入菱湖深
迹與黃鶴近野風吹白芷山月搖青軫
詩祖吳叔庠到君才不盡

身當青山秀文體多郢聲澄澈湘水碧
泱泱楚天青時人格不同至今罕知名

昔賢敦師友此道君獨行

別時春風多掃盡雲山雪爲君中夜起
孤坐石上月悠然遺塵想邈矣達情說
故人不在茲幽桂惜未結

秦系贈烏萃明府云東杖政成時清溪弄
釣絲當年潘子貌避病沈侯詩漉酒迎
賓急看花署字遲楊梅今熟未與我兩
三枝

殷文珪題太學博士丘光庭幽居詩云舜
軌堯文混九埃重明宏構集良材江邊
雲卧如龍穩天外馳書遣鶴來五夜藥
苗滋沆瀣四時花影蔭莓苔草玄門似
山中靜不是公卿到不開

靈一宿湖州靜林寺云山寺門前多古松
溪行欲到已聞鍾中宵引領尋高頂月
照雲峰凡幾重

學館卷之六
藝文類
耿緯陪燕湖州公堂云謝公爲楚郡坐客
是瑤林文府重門奧儒源積浪深壺觴
邀薄醉笙磬發高音未至才仍短難隨
白雪吟

吳興掌故集卷之六